

1 PETERE

Peterem dis tcgãyas tc'ãà di sa

Téé-cookg'ai sa

Peterem di ne nxará-kg'ao ne xg'ao gane di dtcòmàn domka kái xgàrakuan hěé naka xháéan hěéthěé q'oo koe hàna.

Petere ba kò ghùi-ghui tcáo ne, a ko máá, Nqarim nxará tcg'òòà hãa ne khòe ne e, témé. A ba a kò Jeso Krestem ka tc'ěe-tc'ěe ne, ncěe Gam di x'ooan hěé, naka x'ooan koe těean hěé, naka Gam di hààn hěéthěé di nqòàn máà nea hãa ba.

Gane di xgàrase ne ko Jesom ka dcěéè. Ncěeta méé ne ma qarika téé naka qào tcáo. Ncěem nqõóm koe i ko gane di dtcòmàn kúrúa bódè, igaba ne gha ěem gha Jeso Kreste ba x'áísem cáím ka kàbia máàe e.

Qaa-qaasa kg'uia ne:

- xgàrakua ne
- komsana ne
- tcom-tcomsa
- nqòò sa
- kg'òèa hãa nxõá ne

Tcgãyas q'oo koe hàna zi:

- Nqarim di kgoarakua ne (1:3-12)
- Tcom-tcomsase kg'òèa ne (1:13-2:10)
- Dùú sa méé ne dtcòm-kg'ao ne kúrú xháéan koe ne kò hãa ne (2:11-4:19)
- Cg'áré-cg'aresea ne (5:1-14)

Nqarim di kgoarakua ne (1:1-12)

Tsgámkaguku zi

¹ Petere ra a, x'áè úú-kg'aor* Jeso Krestem di ra, a ra a ko *ncêes tcgãya sa* Nqarim nxará tcg'òóa mááse ne khòè ne góá máá, ncêe tsai-tsaisea hãa ne, a cg'áè-kg'ao khama x'ãèa hãa ne: xg'aekum Ponto dim koe hëé, naka Galatia dim koe hëé, naka Kapatokia dim koe hëé, naka Asia dim koe hëé, naka Bitunia dim koe hëéthëé hàna ne.

² Nqarim Abo ba nxãakamaga q'ana hãase *nxará tcg'òóa mááse tua*, Me ko *Tcom-tcomsam* Tc'ëe ba tcom-tcomsakagu tu u, nxãasega tu gha Jeso Kreste ba komsana a Gam di c'áòan cgoa cgáìè ka:

Cgómkuan hëé naka tòókuan hëéthëé mée i gatu koe càùse.

Kg'õèas nqòò sa

³ Dqomèmè méém Nqarim gatá dim X'aigam Jeso Krestem ka Xòò ba. Jeso Kreste ba x'ooan koe ghùian kam Gam di kaisa thòò-xama-máákuan ka kabase ábà taa hãa, nxãasega *ta gha* kg'õèas nqòò sa úú ka.

⁴ Ncêe nqòòan ta úúa hãa, nqarikg'ai koe ta gha q'òò ts'eekg'aian di i, kaà tite, a ts'óó tite, a cg'ãa-cg'anasea hãa tite e. *Nqari ba* gaa koe tòóá máá tu ana,

⁵ gatu ncêe ko dtcòmàn koe guu a Nqarim di qarian ka qãèse qgóó a kòrèè tu, nxãakg'aiga tu gha síi kgoarakuan hòò ka, ncêe gha còò di xu x'aè xu ka tseegukaga x'áìè e.

⁶ Ncêe gúúan domka tu ko qãè-tcao, gatà i ga ko ma qaase, xòm x'aè-coa ka tu ga ncêeska tãáka zi kúrúa bóòku-qhàò zi ka tshúù-tcaokaguè igabaga.

* **1:1: x'áè úú-kg'ao** - Gerika sa ko “apostolo” témé.

⁷ Gazi di tsééa ne gatu di dtcòmàn tseegu ii sa x'ái si i. Gautan igaba, ncêe gha kaàkaguè, ne gha c'eean cgoa kúrúa bódè. Gataga méé i dtcòma tu, ncêe kaisase gautan ka qaa-qaasa a, kúrúa bódè. Nxãaska tu gha Jeso Krestem ko x'áìem cárn ka dqòmkuàn hěé naka x'áàn hěé naka tcomkuàn hěéthěé hò.

⁸ Ncêe bóò Me ta ga tu hãa igaba tu ncàma hãa ba, ncêe tu ncêeska bóò Me tama igaba tu ko Gam koe dtcòm ba, a tu a x'áàko qãè-tcaoan ncêe kg'ui a nxàèè tite cgoa qãè-tcaoa.

⁹ Gatu dis dtcòmòs ko qaa sa tu ko hòò khama, ncêe kgoarakuan gatu di tcáóan di sa.

¹⁰ Porofiti xu kò ncêe gatu koe gha hààs cgómkus ka porofita, a xu a kò ncêe kgoarakuan koe tcãà tcáó a qarika qaa a.

¹¹ Kúrúa xu kò bóò, dùútsa x'aè ka i gha hàà sa, a i a gha ntama hàà sa. Me kò gaxu koe ko hànám Tc'ëem Krestem di ba x'aèan cookg'ai koe nxàea tseegukagu Krestem di xgàrasean ka, naka xùri gha ko x'áàn ka hěéthěé e.

¹² I kò gaxu koe x'áísea hãa, ncêe zi gúù zi xu tsééa mááse tama, a ko gatu tsééa máá tu u sa; gúù zi èe tu ko ncêeska bìrìèa zi, èe ne kò èe qãè tchõàn xgaa-xgaa tu u x'aè ka, ncêe ko nqarikg'ai koe guu a tsééa óáèam Tcom-tcomsam Tc'ëem ka. Moengelean ga ko ncàma hãa, ncêe zi gúù zi i ga kò bóò sa.

Tcom-tcomsas kg'õè sa (1:13–2:10)

¹³ Tc'ëea tu kg'ónò, naka qgóósea hãa, naka tua gatu di nqòòan cg'oèase úú cgómkuàn koe, èe tu gha Jeso Krestem kò x'áíse x'aè ka máàè e.

14 Komsanako cóán khama méé tu hěé, naka zi cg'ãè zi tc'ěe zi táá tc'ãà-cookg'ai tu u guu, ěe tu kò *Nqari ba* tu c'úùà hãa x'aè ka kg'aia úúà zi.

15 Igaba ěe kò tcii tu um ma tcom-tcomsa ii khamaga ma méé tu ma wèè gúùan ěe tu ko kúrú koe tcom-tcomsa ii.

16 Góásea i hãa a ko máá: “Tcom-tcomsa méé tu ii, Tíí Ra tcom-tcomsa Ra a ke,” témèè khama.

17 Ncèè *Nqarim*, ncèe khóèan tãákase xgàra tama, a ko khóèan di zi tséé-kg'ám zi ka khóèan xgàra ba tu kò Abo ta ma tcii ne, méé tu nxãaska *ncěem nqõómkg'ai koe* tu cg'áè-khoean khama ma x'ãèas noose *Nqari ba* q'ádàse kg'òè.

18 Q'ana tu hãa, dùús cgoa tu kò káà hùis kg'òè-kg'áms gatu dis koe x'ámá tcg'òóèa sa, ěe tu kò gatu ka tsgõosea xu koe hòòà sa. Seleferan hěé kana gautan hěéthěé khama ii zi gúù zi kaàko zi cgoa tu x'ámá tcg'òóè ta ga hãa,

19 igaba qaa-qaasa c'ádàn Krestem di ka a kò ii, ghùu-coam chìbi úú tama a q'ano ba.

20 Gaam ncèe nxãakamaga nqõóm ko tshoa-tshoases cookg'ai koe kò *Nqarim ka* q'ãàèa ba, igabam kò còò di xu x'aè xu ka hàà x'áiè ba.

21 Gam koe tu ko guu a *Nqarim* koe dtcòm, ncèe ko x'ooan koe ghùì Me a x'áàkagu Mea ba, nxãasega i gha gatu di dtcòmàn hěé naka nqòòan hěéthěé *Nqarim* koe hãa ka.

22 Tseeguan komsana ka tu q'ano-q'anosea hãa, a tu a gatu ka qõesean koe tseegu di ncàmàn úúà, ke tu q'ano-tcáóse qarika ncàmku.

23 Kabase tu ábàèa hãa khama, kaàkom cgùrim koe guu tamase, igaba kaà tamam cgùrim koe guu

a: kg'õèa hãa a chõò tamam kg'uim Nqarim dim koe guu a.

²⁴ *Nqarim dis Tcgãyas ko méé a ko máá:*

“Wèém khòè ba dcãan khama ii,
i wèé x'ààn gam di, qãáka di zi x'aa zi khama ii.

Dcãa ne ko c'òò,

i x'aan tcheè,

²⁵ igabam ko X'aigam dim kg'ui ba

chõò tamase hãa,”

témé khama. Ncèe ba gaam kg'uim ga me e, ncèe tu kò qãè tchõàn koe guu a xgaa-xgaaè ba.

2

¹ Gaa domka méé tu wèé gúuàn cg'ãè koe tcg'òóse, naka táá c'èe koe ga kàaku di ii guu, naka táá qãè khòèan khama ko ma kúrúse guu, naka táá tauku di ii guu, naka gataga táá c'èe koe ga cóèku di ii guu.

² Kãbase ábàèa cóán khama méé tu ii, *Nqarim di* kg'uiian di bìian xgónèa a, kàa úú tama a, gaan koe tu gha nxãasega kai a kgoaraè ka.

³ X'aiga ba qãè Me e sa tu xáma hãa ke.

Kg'õèam nxõá ba hèé nakas tcom-tcomsas qhàò sa hèéthèé e

⁴ *X'aigam* koe hàà, kg'õèa hãam nxõá ba, ncèe ko khòè ne ka bóòa xguèè, igaba kò Nqarim ka nxará tcg'òóèa ba, a ba a Gam koe qaa-qaasa ii.

⁵ Ke tu gatu igaba kg'õèa nxõán khama ma tshàòè, naka tua *Tcom-tcomsam* Tc'èem dim nquu ba ii, *gaa koe* tu gha tcom-tcomsa xu peresiti xu ii, a ko Tc'èem di zi dàà-mááku zi kúrú, ncèe ko Jeso Krestem koe guu a Nqari ba qãè-tcaokagu zi.

⁶ *Nqarim dis Tcgãyas* q'oo koe i ko máá:

“Bòò, Sione koer ko nxõá ba tòó,

nxárá tcg'òóèa a qaa-qaasam nxõám tcúú di ba,
me cuiskaga wèém ãe ko Gam koe dtcòm ba,
sau-cgaekaguè tite,”
témèè khama.

⁷ Gatu ãe ko dtcòm tu kam ncẽem nxõá ba cgáé
me e. Igaba ãe dtcòm tama ne *méé ne ncẽe kg'uiian
komsana, ncẽe ko máá:*

“Nxõám ãe tshào-kg'ao xu ka bóòà xguièa ba,
nxãa ba tcúú dim nxõá ba kúrúa,”
témé e.

⁸ Si ko *c'ẽe koe gaia máá:*

“Ncẽe ba nxõá me e khòè ne gha kúrú ne tcgàba ba,
a khòè ne ko cg'áékagum nxõá me e,”
témé.

Tcgàba ne ko, kg'ui ba ne kò ntcoe khama - si nxãa
sa tc'èea ne mááèa hãas ga si i.

⁹ Igaba tu gatu nxárá tcg'òóèa tu khòè tu u, x'aiga
tu u, a peresiti tu u, tcom-tcomsas qhàò sa, Nqarim
ka q'òòèa tu khòè tu, nxãasega tu gha cgáé zi gúú zi
Nqarim di zi xгаа-xгаа ka, ncẽe ko ntcúúan q'oo
koe tciia tcg'òó tu u a Gam di are-aresa x'áàn koe
tciia óa tu u ba.

¹⁰ C'èe x'aè ka tu kò khòè tu tama tu u, igabaga tu
ncẽeska Nqarim di tu khòè tu u; c'èe x'aè ka tu kò
cgómkuan hòò tama, igaba tu ncẽeska cgómkuan
hòò hãa.

Dúú sa méé ne dtcòm-kg'ao ne kúrú xháéan koe ne kò hãa ne (2:11–4:19)

Nqarim di ne tséé-kg'ao ne khama ma kg'òè

¹¹ Ncàm-ncamsa tuè, dàra-kg'aoan hẽé naka tãá
nqõó koe guua khòèan hẽéthèé khamar ko ma

dtcàrà tu u, cg'ǎè zi tc'ěe zi cgàam di zi koe tu gha tcg'òóse sa, ncěe khóèm di tc'ěean cgoa ko x'ǎàku zi.

¹² Eěta ne ko ma tǎá zi qhàò zi di ne cg'ǎè zi gúù zi ko kúrú tu khóè tu khama ma tshúù kg'uian gatu ka kg'ui igaba méé tu gatu gane xg'aeku koe qǎèse kg'òè, naka ne nxǎasega gatu di zi qǎè zi tséé zi bóò, naka Nqari ba ěem gha ko hààm cáím ka x'áàkagu.

¹³ X'aigam *Nqarim* domka méé tu wèé qarian khóèm di koe máàse: x'aiga-dxoom koe ga igaba ncěe tc'amaka hàna ba,

¹⁴ kana tc'ǎà-cookg'aian koe igaba, ncěe gaam ka tsééa tcg'òóèa a, a ko hàà ěe ko chìbian kúrú ne xgàra, a i a ěe ko qǎèan kúrú ne dqòm.

¹⁵ Nqarim di ncàmà ne gatà ii, qǎè gúùan kúrúan ka tu gha ěe kóma q'ǎa tama a kǎà tc'ěe khóèan nqookagu.

¹⁶ Kgoarasea ne khóè ne khama méé tu ma kg'òè, igaba tǎá gatu di kgoarasean kúrú naka i *c'ěe* cg'ǎèan qàbi tcǎà guu; kg'òè méé tu Nqarim di tu tséé-kg'ao tu iise.

¹⁷ Wèé khóèan tu tcom. Gatu ka c'ěean tu ncàm. Nqari ba tu q'áò. X'aiga-dxoo ba tu tcom.

Krestem dis xgàrakus dis sere-sere sa

¹⁸ Qǎàn méé i gaan ka q'òòsean wèé tcoman cgoa komsana; ěe qǎè a tc'auan koe cúí tamase, igabaga ěe xgàrá ne koe ga hěéthěé e.

¹⁹ Ncèè c'ěem khóèm kò Nqari bam máàsea hǎa domka kǎà chìbise xgàràèa, a ba a qáò tcáo ii, nem gha *Nqari ba* dqòm me.

²⁰ Ncèè chìbian tu kò kúrú a ko gaan domka xg'ámme, a tu a qáò tcáo ii ne tua gha gaan domka dqòmme? Igaba ncèè qǎèan kúrú domka tu kòo

xgàraè, a gaan koe qáò tcáo ii nem gha Nqari ba dɔmò tu u.

²¹ Ncēes gúús domka tu kò tciìèa, gatagam kò thēé Kreste ba gatu domka xgàraè khama, sere-sere sam kò guua máá tu u, nxãasega tu gha xùri dàò Me ka,

²² “cúí chìbi ga kúrú tama ba,

i ko táá cúí kàaku ga kg'áma ba koe tcg'oa.”

²³ Eēm kò cóèè kam kò táá cóèkuan kabia máá ne, a ba a kò ēem kò xgàraè ka táá bìrí ne, kabisem gha a hàà xgàra ne sa, igabam kò ēe ko tchànose xgàra Mem koe máàse.

²⁴ Gam ncēe kò gatá di cg'urian tc'áróa ba ka xgàu hìis koe xgàma hãa ba, nxãasega ta gha cg'urian x'óóa máá, a ta a gha tchànoan kg'òèa máá ka. Gam di chìbian ka tu kg'òèkaguèa hãa.

²⁵ Hoàko zi ghùu zi khama tu kò ii, igaba tu ncēeska gatu dim Kòre-kg'aom koe kabisea hãa khama, Q'òé-kg'aom gatu di tc'ēan di ba.

3

Khòè zi hēé naka khòè xu hēéthēé e

¹ Khòè saoè, gaam dàòm cúim kaga méé sao gasao di xu khòè xu máàse. Ncēè cúí-kg'áíá xu ga kò *Nqarim dim* kg'ui ba dtcòm tama ne, xu ga nxãaska káà kg'uise gaxu di zi khòè zi di kg'òòan ka kúrúè a dtcòm,

² ncēè nta sao ko ma *Nqari ba* q'ào a tcom-tcomsa ii sa xu kò bóò ne.

³ Gasao di t'òèan méé i tc'áróa sao ka tchàa koe táá guu, tóróèa c'òòan hēé, naka gautan cgoa kúrúèa gúuan hãa di hēé, naka t'òè qgáían hãan ka hēéthēé koe.

⁴ Igaba méé sao tcáóa sao q'oo koe t'òè sao ii, t'òèan chõò tama a, qãè a tc'aua tc'èean di i, ncêe Nqarim tcgái q'oo koe kaisase qaa-qaasa a.

⁵ Ncêea gaam dàòm khòè zi tcom-tcomsa zi kg'aika di zi, ncêe kò gazi di nqòòan Nqarim koe tòóa hãa zi kò ma t'òè-t'òese ga a, gazi di xu khòè xu máàsean ka khama.

⁶ Sarahs khama méé sao ii, ncêe kò Abrahama ba komsana sa, a sa a kò gas òim x'aiga ba ta ma tcii me. Ncêe qãè gúùan sao kò kúrú a c'èe gúù kaga q'áòkaguè tama ne sao gha gas di sao cóá sao ii.

⁷ Khòè xaoè, gatà iim dàòm cgoa méé xao gazi cgoa kg'òè naka q'ãa, kg'amka tc'áro zi i sa. Gaxao cgoa zi *Nqarim di* aban kg'òèan di di zi q'òò-kg'ao zi i ke méé xao tcomkuan cgoa qgóó zi, nxãasega i gha gakhao di còrèan táá cúí gúù kaga xgàèè ka.

Qãèan kúrú domka xgàrasea ne

⁸ Chõò dis ka méé tu wèè tu ga cúí tc'èe, naka thòò-xama-mááku, naka ncàmku qòekua hãa khòè khama ma, naka cgómku di ii, naka cg'aré-cg'arese.

⁹ Táá méé tu chìbi sa chìbis cgoa suruta kabi guu, kana cóèku sa cóèkuan cgoa kabi guu; igaba méé tu ts'ee-ts'eekg'aikuan cgoa kabi i; gaan domka tu tciièa hãa ke, nxãasega tu gha ts'ee-ts'eekg'aikuan q'òò ka.

¹⁰ *Nqarim dis Tcgãyas ko méé khama a ko máá:*

“Dìim wèém èe gha ko kg'òèan ncàm ba, a ba a qãè cáman bóò kg'oana ba méém gam òim tam ba cg'ãè gúùan koe hëé naka kg'áma ba kaa di kg'uiian koe hëéthhëé xgàè.

¹¹ Cg'ãè gúùan koe méém tcg'oa naka qãèan kúrú, tòókuan méém qaa naka baa x'ãà máá a.

12 X'aigam di tçgáíá nea ãe tchàno ne koe hàna,
i ko Gam di tceean gane di còrèan komsana,
igaba i X'aigam di kg'áían
ãe ko cg'ãèan kúrú ne cgoa tsééa xg'ae tama,"
témé.

13 Ncèè qãè gúùan kúrú tu kòo x'ãà máá ne i gha
dìín thòò-thòò tu u?

14 Tchànoan kúrú domka tu ga ko xgàrase igaba
tu ts'ee-ts'eekg'aièa hãa. Táá méé tu ãe ne ko bèe sa
bèe guu, táá q'aekaguè guu.

15 Igaba méé tu tcáóa tu koe Krete ba X'aigam
iise nxará tcg'òó naka dqomè Me. Ncèè c'èem khóèm
kòo ãe tu úúa hãa nqòòan ka tèè tu u ne méé tu wèè
x'aè ka xòá me tu gha sa kg'ónòsea máána hãa.

16 Igaba méé tu qámsean hëé naka tcomkuan
hëéthëé cgoa ncèe gúùan kúrú, naka tchàno tcáóan
úúa hãa, nxãasega ne gha dùús wèés cg'ãès ãe ne ko
gatu ka kg'uis koe, ãe ko Krestem koe qãèse kg'òèan
gatu di ka ko kg'ui ne, saucgae ka.

17 Gatà ma tu ga ko ma qãèan kúrú igaba tu gha
xgàrase, ncèè Nqarim kòo tc'èe ne. Ncèes gúù sa
cgáé si i, cg'ãèan kúrú domka xgàrasean ka khama.

18 Krestem igabam kòo cúí q'oro chìbian domka
xgàràè khama, tchànom Khóèm iise tchàno tama
ne khòè ne domka, Nqarim koem gha nxãasega úú
tu u ka. Ncèe kòo tc'áróm koe x'ooan koe tcãàè, a
Tc'èem ka kg'òèkaguè ba.

19 Gaam Tc'èem koe hãnasem kòo síí ãe qáéèa
tc'èean qáé-nquuan koe xgaa-xgaa.

20 Nqari ba xg'ao komsana tama ne di tc'èe e kò
ii, ncèem kòo Nqari ba *tcóóse ne gha ka qáo tcáóse*
qãà ne, Nowam ko araka ba tshào x'aè ka. Cg'orò

ne khòè ne 8 ne cúí nea kò *arakam* koe hàà, a tshàam koe guu a kg'òèkaguè.

²¹ I gaa tshàan tcguù-tcguukus dis x'ái si i, ncēeska igaba ko kg'òèkagu tu u sa, cgáé-q'oom di cg'urian xg'aàra tcg'òós ka tamase, igabas tchànos tcáós dis dtcàrà si i Nqarim koe. X'ooan koe tēs Jeso Krestem dis ka i ko kgoara tu u,

²² ncēe nqarig'ai koe qōða ba, a ba a kg'áòm x'òàm Nqarim dim xòè koe hàna, moengelean hēé naka tc'âà-cookg'aian hēé naka qarian hēéthēéa Gam dòm q'oo koe hãa.

4

Nqari ba kg'òèa máá

¹ Ncēm ma Kreste ba Gam dim cgàam koe xgàràèa khamaga ma méé tu gatu igaba Gam di tc'ēe-kg'áran úúa, gaam ēe cgàam koe xgàràèa hãa ba chibian cgoa xg'ara hãa ke.

² Gaa domkagam ncēeska nqōómkg'ai di kg'òè-q'ooa ba koe cg'âè zi tc'ēe zi khóèan di zi kg'òèa máá tama, a ko Nqarim di ncàman kg'òèa máá.

³ Ncēe nqáéam x'aèm ka tu kò tc'ãða x'aèan kg'òè a ko tãá zi qhàò zi di ne ko tc'ēe sa kúrú khama, a ko cg'áràn kúrúate, cg'âè zi tc'ēe zi hēé, kg'áà nqáésean hēé, nqàrean hēé, kg'áàè ko zi qgàì zi koe hãa sa hēé, naka kúrúa mááse di nqárian dqomàn ncēe ntcoe-ntcoesa hēéthēé e.

⁴ Gane cgoa tu kò táá xg'ae a tchõà úú tamas kg'òè sa kg'òè domka ne ko are tu u, a ko gatu ka cg'âèse kg'ui.

⁵ Igaba ne gha ēe x'ooan hēé naka kg'òèan hēéthēé xgàran kg'ónòsea máána hãam *Nqarim* koe xoara mááse.

⁶ Ncëes gúùs domka i qãè tchõàn ãe x'óóa khòèan koe ga thée xgaa-xgaaèa hãa khama: nxãasega ne gha cgàam koe khòèan khama ma xgàràè, a ne a gha tc'ëem koe Nqarim *ko ma kg'õè* khama ma kg'õè ka.

⁷ Wèé zi gúù zi di chõò-q'ooa ne cúù u. Ke tu q'ano-tcáo naka qgóósea hãa, nxãasega tu ga còrè ka.

⁸ Wèé zi gúù zi tc'amkg'ai koe méé tu kaisase ncàmku, ncàmku sa ko kái zi chibi zi qàbia tcãà ke.

⁹ Qãèse méé tu x'áéa tu koe hààkaguku, kg'ui úú tamàse.

¹⁰ Eëm ma Nqari ba tãáka dàòan cgoa Gam di cgómkuan màà tua hãa khama méé tu ãe zi máàku zi qãèse tséékagu naka c'ãe ne tsééa máá.

¹¹ Ncëè c'ëem khòèm kò kg'ui ne méém Nqarim di kg'uiian *ko kg'uim khòèm* khama ma kg'ui. C'ëem khòèm kò tséé ne méém Nqarim màà mea qarian cgoa tséé, nakam gha nxãasega Nqari ba wèé zi qgài zi koe dqòmè, Jeso Krestem koe. Gam koe méé i chõò tamase dqòmkuan hëé naka qarian hëéthëé hãa. Amen.

Dtcòm-kg'ao tsi i domka xgàrasea ne

¹² Ncàm-ncamsa tuè, thõòkas kúrua bóòkus ãe tu ko xgàràès ka méé tu táá arekaguè guu, c'úua tuas gúùs kúrué cgae tu u kos khama ma.

¹³ Igaba méé tu qãè-tcao, ncëè tu kò ma Krestem kò ma xgàrasea hãa khama ma xgàrases ka, naka tua gha nxãasega Gam dim x'áàm ko x'áise ka kaisase qãè-tcao.

¹⁴ Krestem dim cg'òèm domka tu kò cóèè ne tu ts'ee-ts'eekg'aièa hãa, Tc'ëem x'áàm di ba hëé naka Nqarim di ba hëéthëéa gatu koe hãa khama.

15 Igaba ncèè gatu ka c'ëem kò xgàrase ne méém táá cg'õo-kg'ao ba ii, kana ts'ãà-kg'ao ba ii, kana cg'ãè kúrú-kg'ao ba ii, kana khòè ne di gúúan koe káíse tcãàseam khòè ba ii guu.

16 Gaa domka, Krestem di tsi khòè tsi iise tsi kòo xgàràè ne méé tsi táá saucgae guu, igaba méé tsi ãe tsi úúam cg'õèm domka Nqari ba dqomè.

17 X'aè ba hààra hãa, xgàrakuan gha Nqarim dim nquum *di ne* cgoa tshoa-tshoa di ba. A ncèè gatá cgoam kò tshoa-tshoa ne sa gha dùú sa kúrúse ãe Nqarim di qãè tchõàn komsana tama ne koe?

18 “Ncèè tchànóm khòèm koe i kò qari ii kgoaraèm gha sa, ne ia gha nxãaska ãe Nqari-tcáó tamam khòèm koe hěé naka chìbi-kg'aom koe hěéthěé dùú sa kúrúse?”

19 Gaa domka méé ne, ãem ma Nqari ba tc'ëea khama ko ma xgàrase ne, tcom-tcomsam Kúrú-kg'ao ba máàse, naka nea qãèan kúrú cgoa còoka qõò.

Cg'aré-cg'aresea ne (5:1-14)

5

Kaia ne hěé naka cg'aré ne hěéthěé e

1 Eë gatu xg'aeku koe *hàna xu kaia xu kerekes di xu* cgoar ko kg'ui, ncèer tíí thěé gaxu ka c'ëe ii ra. Krestem di xgàrasean tcgáía te cgoa bóòà hãa a gha gataga ncèe ko hàà x'áíè x'áàn koe hãa ra,

2 *domkar ko kaisase dtcàrà xao o a ko máá*; Ghùu zi Nqarim di zi xao kòre. Q'óé zi, qaase i ko domka tamase, igaba tcáóa xao di tc'ëean domka, ãem ma Nqari ba ncàma hãa khama. Ncèes tséé sa kúrúan

di ncàmàn úúa hãase méé xao kúrú si, surutan qaa tamase.

³ Ghùu zi ãe tshàu q'ooa xao koe tcãàèa hãa, kòre zi xao gha ka zi koe, méé xao táá x'aigan kúrúse guu, igaba méé xao gazi koe x'ái sa ii.

⁴ Naka xaoa gha nxãasega, ãem ko kaim Kòre-kg'ao ba hàà ne, kaà tama x'ààn dis cába sa hò.

⁵ Gatu ãe cg'aré tu méé tu gataga ãe xu kaia xu komsana. Wéa tu ga méé tu cg'aré-cg'aresean cgoa hãakaguse gatu ka c'ãea ne koe,

“Nqari ba ko ãe ko bóòse ne xguì igabam ko ãe ko cg'aré-cg'arese ne cgòmkuàn máà” ke.

⁶ Gaa domka méé tu cg'aré-cg'arese Nqarim dim kaim x'òàm dòm q'oo koe, nxãasegam gha hààkom x'aèm ka ghùu tu u ke.

⁷ Gatu di káise tc'ãe-tc'ãesean wèé ga Gam koe nce-meà úú, gatu cgoam tchõà úúa ke.

⁸ Qgóósea méé tu hãa naka kókòda hãa. Gatu dim cg'õo-kg'aom dxãwa ba ko kg'aekom gàm khama ma caate ke, a ko c'ãe khóèan qaa, kg'oom gha a.

⁹ Xguì me naka dtcòmàn koe qarika téé, q'ana tu hãa, ne gatu ka c'ãe ne nqóòmkg'ai koe gatà ii xgàrasean koe hàna hãa ke.

¹⁰ Eẽ tu xòm x'aè-coan xgàrasea hãa qãá koem gha Nqarim wèé cgòmkuàn di ba, ncèe ko Gam di chõò tama x'ààn koe Jeso Krestem koe tciaa úú tu u ba, Gam ka kaba-kaba tu u, a gha kúrú tu u tu qari, a qarika téé, tchànose.

¹¹ Qarian méé i Gam koe chõò tamase hãa. Amen.

Còò di zi tsgàmkgaku zi

¹² Silefanom* di hùikuan cgoar xòmse góá máá tua hãa, ncëer ko máá tcom-tcomsam qõe me e témé ba. Korè tu ur ko a ko nxàea tseegukagu, ncëea Nqarim dis cgómkus tseegu di si i sa. Gaas koe qarika téé.

¹³ Eë Babilone koe hãnas *kerekes*, ncëe gatu cgoa nxará tcg'òóèa sa ko tsgám tu u, me ko gataga thëé tirim cóám Mareko ba tsgám tu u.

¹⁴ Tsgámku tu x'obèkus ncàmkuan dis cgoa.

Tòókuan méé i gatu wèé tu cgoa hãa, Krestem koe hàna tu.

* **5:12: *Silefano*** - Silefanom di c'ëe cg'õèa nea Silase e.

Kabas Qae-xg'ae sa
The New Testament in the Naro language of Botswana
copyright © 2012 The Bible Society of Botswana

Language: Naro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 18 Apr 2025 from source files dated 31 Aug 2023

d01ddea0-c0e8-5bc4-86fa-b235639fa99b